

四庫全書

集部

欽定四庫全書

集部

淳熙稿卷六

詳校官庶吉士 臣 吳烜

主事 臣 呂雲棟覆勘

總校官編修 臣 朱 鈐

校對官中書 臣 吳樹萱

謄錄監生 臣 廉永倫

欽定四庫全書

淳熙稿卷六

宋 趙蕃 撰

七言古詩

正月二十四日雨霰交作

杏花燒空紅欲然
柳色亦復青可憐
胡為雨霰忽交作
已洗破衾還被綿
去冬梅時雪復雪
未省好看冰玉潔
祇今縱有已殘枝
零落教人已愁絕
故知好雨當趣耕

快雨仍須作快晴放渠花柳十分事我欲浩蕩郊原行
二月十日夜雨起書曾移忠禾譜後

去年秋旱冬尤劇一雪不能濡土瘠立春日雨雖應時
到今闕然又幾日遊人但欣春物榮農夫痛心田禾耕
我因于役偶適野駭見蓬勃煙埃生我今一官非勸農
為民閔雨常顛顛如聞春寒雨之候病骨不憚添衣重
朝來數點初藪藪勢墜黃昏成霖霖雖云潤物要無聲
未揀田疇龜背暴眼前市糴雖云賤復道輸租錢乏見

從來穀賤必傷農政亦何能堪此旱天公用意何難為
三日為霖事可知區區折腰困日糴苦憶村春宿雨時
屠龍先生曾夫子著書斤斤良有以徃曾持獻儒林蘇
為歌秧馬附書尾髯孫知我此書愛遺我殷勤意何在
世人菽麥或未分而翁有意除稊稗我今一官故不堪
此書歸田為指南便當教兒罷群讀此寧憂飯不足
二月十二日偶題

空庭無人風自掃風定時聞有啼鳥簿書幸免苦束縛

文字何妨恣探討菊湯淪茗雜鼠糞瓦鑪欲作風泠泠
睡魔於此不得靈簷間臥對山橫青

二月十七日

入春不雨憂在田數朝乃復相屬連今晨得晴絕可喜
病體素羸猶著綿杏花始開忽已落桃李安能問今昨
獨餘楊柳故青青乃似仍叔之子弱春今二月已強半
忽忽何方為羈絆雨雖未厭愁奈何又聽僕僕林鳩喚

社後一日風雨中作

南山北山雨未分東村西村雞叫羣病夫深居百不聞
香爐茗椀頻策勲浮生蹤跡空中雲斯須變化歸無垠
春風九十又足云眼中紅白徒紛紛

張王臣載酒約同過梁和仲既以風雨大作舉
杯相屬而止偶成四韻呈和仲

祇疑寒食無風雨不料今晨頰如許縱然風雨敢怨尤
留得佳人駐南浦佳人雖駐亦何為杯酒竟成孤晤語
巴陵他日記同曾君歎淹留我羈旅

三月十八日

巴陵一月雨不休豈惟人病天亦愁蠶飢麥腐穀種壞
農夫田婦呼天求巴邑有客方倦游杭湖欲歸思具舟
冥冥政爾羨歸雁拍拍安得從輕鷗遠書數月絕不得
爾窮故與吾髣髴或云此雨祇此域又道淋漓遍江國
夜來痛飲不知極終日破牀成兀兀感斯風雨憶江東
詩就烏栖窻紙黑

二十一日雨

疾風吹倒庭前樹更有飛來雨如注終朝畏暑自脫巾
亟起收書不能屢前山雲重如潑墨坐想溪流高數尺
是間無乃隔分龍點滴纔堪清几席前時小旱已作憂
三日為霖遂不休早禾盡實晚禾秀造物於此功無留
祇今望霓尤所急百里之行半九十民乃犇走奉神祠

神盍經營足民食

時西山方叔東嶽祠基
今日之雨謂神告也

寄懷

風聲雨滴相騷屑深山深處應凝雪豐年未慮米如珠

病骨自安衣百結隣翁瑾戶行徑斷恠我讀書聲屋徹
茲時意緒政復佳欲往尋梅問何濶

田家即事

東村鞭牛耕未已西村車水愁秧死可憐番人長苦辛
旱乾水溢年年事旱乾水溢天之為天意如回一彈指
所愁郡縣無良吏不得辛勤住田里

長安行

東街女兒誰家子有名籍籍長安市不知身失不自回

顧侈金珠炫羅綺西街貧女夫何如年長不見行媒車
有時視倡獨歎息從之不可翻躊躇傷哉彼倡不自醜
顧嘲貧女為牛後此時貧女將何言嫁與不嫁懸諸天

清水道上望隔山桃花盛開

青山深處桃花紅應有幽人住此中又疑山深人迹絕
封泥彈核如芙蓉樹成花開亦既實實落山中還自植
年年歲歲長芳株人人錯認神仙宅

偶得牡丹之白者賦之

梅花當冬吐冰雪古今已復稱高潔春風草木爭寵光
爾乃白乎無得涅屈原放逐楚江濱山高水疾誰與鄰
商山山中四老人漢且終辭肯事秦白山茶有涪翁賦
遵自遠公仍白傳教公已矣不可作風雨明朝埋玉樹

見負梅趨都城者甚夥作賣花行

昔人種田不種花有花只數西湖家祇今西湖屬官去
賣花迺亦遍戶戶種田年年水旱傷種花歲歲天時穰
安得家家棄花只糴米塵甑炊香勝綺旒

對菊成詠

城陰何有唯蓬翳為乏人工欠除薙連朝陰雨早始晴
照眼黃花驚噫噫結根失所少陵悲晚何用好退之詩
那知是物有奇操要並歲寒松栢知

風雨兼旬繼之以雪作惜梅歎

至寶橫道驚路人明珠白璧天不珍風餐雪虐雨更打
委珠碎璧同泥塵天生人材怨不以天亦何心及於爾
不然明珠白璧當愛惜忍使飄零至于此

有懷故居梅花

梅花照耀山下村，舊居不返傷我魂。
破苔履迹誰復掃，定要風雨參成昏。
祇今環堵聊自存，亦有獨樹背竹園。
驟看疑是雲母薄，細睇迺識玉體溫。
裴回竟使不忍去，步遠直欲窮晡暾。
是中有句鬱莫吐，如禪未悟參多門。
須臾月上花且落，四顧無人相與言。
經年取酒藉地飲，飲醉更覺山林尊。

次韻斯遠折梅之作

春歸寂寞誰與傳梅開年後并臘前江南此物處處有
不論水際仍山顛為之著句道所以點檢敗篋曾年年
七言五字古復律非獨愛渠還自憐見君新就之長篇
有如潢潦投清漣俗間比擬不足道老大更爭兒女妍
山行蠟屐要上下水泛艇子思延緣豈惟病思待一洗
直恐高致成輕指定逢縞衣露皎潔仍聽翠羽啁清圓
賦成從使筆併禿飲雋更湏瓶屢眠

對隔壑梅贈斯遠

梅開塹邊勿渠陋倚竹長年固成瘦風期喚得高人就
幾度行看仍落輾是花佳處絕難摹思雖宛轉終不如
我詩有媿渭南趙君句自續東湖徐

憶山中梅送大聲瞻軍赴調

江南梅藥臘前破憶我林園疲坐卧君行正過玉溪邊
雪後應餘欲殘朶君既不飲何以酬詩成寄我無悠悠
得意歸來應不晚雨肥紅綻綠陰稠

初五夜再過昨逢之梅乃酒家保也

前日日莫相逢初今日日斜來看再開然肯作時世粧
蕭然自有無人態題詩欲報故人知為爾停驂一杯買

初十日早起

北風動地木欲折雨既不成當作雪黃昏側聽到鷄鳴
纔有飄蕭興騷屑雖然風力猶未止雨耶雪耶知孰是
幾將被褐出門看不待足前成辟易遲明迺知雪未就
雨亦甚微風獨吼晨炊未暇詢無有亟令問訊鄰家酒

聞鳩有感

可憐鳩拙安無棲
雨來逐婦晴呼歸
我行願晴不願雨
憂樂殆與鳩同機
長安通衢多顯位
長江大扁謀崇利
我圖非利亦非名
胡為役役無寧歲

田家歎

春欲耕時天不雨
小雪不能濡旱土
辛勤僅得遍鋤耰
浸種可憐溝脉縷
忽然一雨催插秧
東阡西陌青山望
謂茲勞逸足報補
豈知亢旱愁秋陽
高田已分鹵莽取
下田庶幾十八九
柰何雨勢反作淫
令我痛心仍疾首

我曹飢餒無足悲不死會值豐登時所嗟官吏不相察
借租日日來符移

有懷江南作田家忙

南風吹動原頭草秧老麥收蚕向了田家政用此時忙
不問兒童與翁媪五溪之俗殊江南刀耕火種不知蠶
勸農未有陶蘇句俗陋不改奚多談

田家行二首

雨聲颯颯斷復來間作隱隱魚出雷田家作苦樂不哀

拔秧揮田政時哉誰知有客洞庭上船破蓬踈蔽無障
何如雨笠與煙蓑相逐田伴歌田歌

江東聞田歌湖北聽田鼓鼓聲于以相疾徐歌調因之
慰勞苦東山絲竹仍携妓風月鳴蛙勝鼓吹何如田鼓
與田歌烏烏坎坎安而和

苦雨感歎而作

不肯官嶺海頗畏瘴癘虞誰知江西山盡處亦有嵐霧
畫若晡五斗何所直千金不保軀司空城旦困刀筆尺

籍伍符愁鉞鈇呀嗟此賊
盜蟻如飛煙一炬斯無餘
柰何徵兵動州閭紛然亦
復勞轉輸戍柵如櫛猶恐
踈江徼一朝成塞隅

連雨即事

官居如穴還如巢數間編竹仍結茅
淫霖更值七八月涼冷不待秋冬交
豈惟寒近感蟋蟀更為役久悲蠨蛸
偶茲得句付排悶嬾復多言強解嘲

長江

長江滾滾來無盡順流逆挽紛成陣誰令轉側入漕河
舟似鳧鷖亦難進長江漕河唇齒間去留異態空浩歎
孰能稍激長江水顧使漕河舟亦起

晚自白沙投宿側水

白沙漫漫風肆威白沙道上行入稀征衣攝葉馬力微
問胡不歸驅以飢浮家洞庭書未來腸九回兮朝莫思
莫投道店鷄已栖一杯自慰無嫌醜

題劉炳先兄弟怡齋

晦庵貽我書滿紙為說君家好兄弟人言是公輕許可
我謂親仁乃渠事客遊偶爾過君廬中有誠齋榜怡字
斯人許可蓋不輕何事齋名契於季嗟余夙昔兩公遊
與君常恨風馬牛何知一見辱傾蓋四海兄弟寧待求
有弟有弟江南州尺書斷絕安與不因君使我增離憂
一夜夢逐滄波鷗

三兄既見過喜而賦此

村居不記元夕期田蠶鐙火俗異宜但餘林月光陸離

所期不來空賦詩明朝風作後日雪祇道來期中已輟
今朝小霽泥未乾或報門前有車轍我窮政爾落荒山
蹙然忽復解我顏平生交舊固多矣風味如此端亦慳
梅雖已謝蘭可掘有酒縱漓醅可撥為予一醉莫深辭
更要好詩書歲月

次韻畢叔文苦旱歎

爾何不歸乎故宇卻向殊方書閔雨江東數月不得書
憶弟看雲在何許舊傳重湖北之北米賤真成等泥土

如何比歲公及私衰竭不能堪再鼓貧家一飯有併日
遠市朝炊或亭午朱門但知梁可厭我輩翻嫌字難煮
晚且禾秀早向實春箴不須逾處暑胡為旱勢復如此
坐致詩人形苦語如聞巫覡有通靈肝蟹似逢人問姬
前朝一雨苦不難况今靡神無不舉會當勞以三日霖
綠浪黃雲看掀舞

呈李齊之文學

大机石頭雲自橫釣魚臺下潮初平側聞左蠡春水生

蛟龍改穴鼉鼉爭扁舟夜泊鄔江尾空山月出中夜起
政須傑句彈壓此乃祖詩成會泣鬼

贈唐德輿通判

憶昔中原全盛日猶推巴蜀多人物況今王氣在東南
北望中原渺蕭瑟先生隱居談典墳博士乃有垂世文
內前之行傳未了鈞黨已到白鷺羣舍人父子自知已
紅藥翻殘棠屢憇逮公四世傳以是池上鳳毛宜翹翹
胡為一再繞別乘縱說翱翔豈其稱雞羣牛阜匪散雜

玉水珠淵自輝映維公大父我曹祖紹聖同年蒙主恩
我今流落不足論附驥詎敢儕青雲鄱陽別去今三歲
邂逅從公寧自意幾思着句道所以筆力甚孱無好思
今辰何以為公壽四世斯文端不朽匪蜀眉山還有否

簡子崧時丞建德

石田渡口鉦鼓鳴憶同居民送君行至今是邦數廉吏
君與韋陸俱其名

謂韋公能
千陸公沈

別來憶君已騰趕故人無

復思漁釣豈知更作畿縣丞未免流俗輕朝傲如君為

學未易論淵源固自
知所尊使其策足上
臺省儉人吉士當以
分輻藏自是王之美
奈何有道貧賤恥漢
宣且識東海蕭吾君
聰明豈不爾願君強
飯力自持九十半百
古語之扁舟僅可頃
刻住便風催人當語
離

懷昔

君不見昔日朗州判
史賢何多考功右史
名不磨當時豈亦為
名計民自思之相與
紀如何後世異於是
我自為我民為爾但
憂潦浸務安居不慮
旱年當使水一時

掘鑿恐不深今日車庠乃無地常聞退之勇詞訟風伯
甫也亦欲鞭起雷公洗吳越我知二子屬風雷引喻政
合離騷轍雖然柳州措說義甚顯神且逃難吏何免

周愚卿用荀卿氏之語以遇名齋從余求詩為

賦古意一首

世俗爭知競冶容紛紛墻穴交相從誰知亦有秉正色
奉養辛勤供織春過期不嫁心不悔偃蹇數夫終德配
君不見蘭生林下久含章得時可以充君佩

遂初泉

并序

成父以孫子進家法釀酒既成竒甚予病其名不足見吾故人風味為易今名且賦是詩

荆溪溪水清無底下有亂石白齒齒東坡先生所卜居想像神遊應不死後來高躅嗣者誰東門孫氏賢墳麓不惟文采風流是釀酒喜客俱似之憶昨為官在吳里三年徵逐一日爾詩傳活法付乃兄酒有名方屬吾弟當時釀熟曾入唇大孫絕嘆能逼人世間名賢久難辨

顧恐石室來亂真遂初自是渠家賦大孫取以名其住
我今以是謚君酒要使交情不忘故嗟予老矣百不如
有竹萬箇中藏書願從吾徒授此術歸去傭田親種秫
次韻曾季永乞筍

鄙夫食肉書生菜要是均為口腹賣穉龍雖美亦菜流
我苦嗜之還自恠君家作屋溪上篁想見春風參短長
奈何反向寒廳乞一束未能成報章

九月晦日

經旬不飲仍廢詩不唯多故病使之黃花潦倒烏柏赤
窮邊物色分付誰空庭索索枯葉吹氣象如我茶且羸
強思把筆與摹寫安得豪壯生毛雖秋冬之間穫稻時
日脚苦翳兩脚垂鳩鳴遠樹蛙吠坎宜我病骨疲支持

同成父過章泉用前韻示之

頻年盡室依此竹意謝朱儒奉囊粟今當舍竹去作吏
竹為嘿嘿如抱辱嗟我作吏豈俗徒雖非計然念則熟
如聞西江之水深無底可以濯纓仍濯足昔人一為功

名誤置碑且慮變陵谷那知立名自有道未妨痛飲離
騷讀人生于世譬于味馬肝不食寧非肉弟當進德使
有聞兄亦自期無碌碌

比見愚卿于廬陵出示楊謹仲詩卷中及其弟
魯卿問其所在云攜琴往嶽麓度夏今日見楊
謹仲又云其弟卓卿近過此奉其母往游洪之
西山迴途游閣阜乃歸爾余方困于道途有歎
于其人作詩須到吉示愚卿及二君云

廬陵得交君弟兄楊子詩中稱魯卿問云攜琴嶽麓行
歸期去日云秋清今晨復見楊子面為言卓卿近相見
王隆閣皂兩仙山遊以娛親赴鮮健我時聞之與楊子
嘖嘖歎息久不已我方五斗困塵埃渠亦棲遲一丘底
魯卿卓卿真愈人枉道儒冠解誤身異日名山倘行過
卧圖好學宗少文

李大椿伯壽見示寶劍歌答之

李子久不調慷慨多雄辭題為寶劍篇贈我何足知我

為讀數過因之重嗟咨尚方願賜有朱雲櫪具帶劔有不疑雲也安能斬禹曼倩脫或逢勝之君才固有用我病且復衰誰能長佩衿陸離但取短缺歌歸來

新桂林戶曹甘叔異過余於津亭留以小飲論
文縣僚有招之者遂敗此興既夕作詩呈之

平生所聞甘叔異半日為泊寶氣亭逢迎稍稍昏忘集
誦說矻矻文章聽其誰呼渠紅裙飲遣我負此雙玉瓶
臨流不寐待月上漫見紫翠橫山屏

讀去非有行集

山嵯峨江汹涌舟疾如飛得無恐忽來何處有竹編勢
與江山欲爭勇回思往日曾倡酬我詩島嶼縈微流鶴
鳧長短天所付追隨恐失邯鄲步

寄題山居

山居舊名需齋在
泉司主管廨中

山居為山何所如非瀟非皖非匡廬問云非山何所居
屋中主人山中徒當簷屹立幾丈餘亦有竹樹相盤紆
朝聽鶴吟暮猿呼那知門外臨通衢或聞此語謂我誣

答以君意誠守株人間有國名華胥其往初不因舟車
神游倏忽已即塗晨雞喚覺猶蘧蘧山名無乃類此歟
冑中有山無地無朱門蓬戶何別區叅前見處成工夫
季承作詩敏捷而工因成長句

我詩縱疾無多工君詩嚴甚仍匆匆君酬我唱輒媿我
野鶩欲晚天邊鴻平生交游不乏此快筆相追屬吾子
莫愁風雨留滯人不爾歸裝孰慰貧

王彥博愚齋

王郎立志誰能擬適遠寧為中道止愚齋之名豈真愚
用心蓋欲師顏子聖門之徒三千人回獨好學學何事
簞瓢陋巷不自貧看此力量如何爾願君勿作歲月計
有為要之亦若是它年究竟所歸宿莫負名齋本來意

畢叔文借示郭峽州詩二軸志其所見

真行黃家元祐腳隱帙奧篇窮秘閣計其胃中所餘地
數百猶能君輩著中朝文物政須此刺史郎官謾今昨
腦脂遮眼失乘黃安得金篦令刮膜

寄青原山常不輕

吾舅每談方外友吃吃醉吟長在口李侯佳句徃徃有
示我不輕詩數首江湖願見非一日豈有聞名不相識
路頭且向鬱孤臺却傍釣臺深處回

戲明叔

晚食以當肉故云巧於貧我云未若子陳子掛箔為圖
能事新剪刀不用求諸并海圍波濤供補紉我今非剪
詎可坼樹林樓閣相參陳君知人窮定何因政坐百巧

逢天嗔天之嗔人或可恕君更白取遮四鄰雖然我詩
聊戲君天生萬象孰主賓渠如愛惜不我借聽渠收卷
藏箱中

簡贈祖高上人

黃山別久阻再披青山路遠終未窺忽逢隱靜高監寺
不但學禪仍學詩禪機最上吾不會詩筆少親今老退
青山臥冢謫仙才功名孰愈凌歊臺

示表弟沈見可

襄公臺上送入日道鄉臺上看出雲窮居偈反不屢到
拄杖容與能平分江湖鶴髮歎老我道路爾足嗟夫君
畫手政自難偷度詩裏還嫌異所聞歸來客去雨亦作
此故未易輕談云

贈于革去非時為武陵尉

憶昨聞君謂君老及見知君得名早文章妙處殆風成
不作揚雄少而好西山南浦飫搜尋武陵桃源覽探討
諸公識面爭我出學子聞風競門掃嗟我無聞不足畏

何事相逢亦傾倒論詩未易當韓豪聊復悲吟似郊島
次韻元衡病酒伏枕

陰從元日到人日四體不佳真若病每煩從事與料理
百戰不能圖一勝幾思屏去不復親茗椀薰爐事閒靜
鳴鳩聒聒殊未已門外雨狂風亦橫此時但覺濁醪賢
少日漫知黃卷聖

屢遺公擇書且寄以詩皆未得報成父弟書云
公擇欲過予再寄

與君相從不知樂別去懸知頓牢落一旬兩詩三附書
底事來音向人邈知君去住良關意養節忍窮非失計
如君豈得終布衣會有高名耀斯世我居正在千山底
落葉填門吹不起薄醪縱有不敢醉留待君來相料理
惠然過我今其時籬下菊香驚早衰南山石老有梅樹
要君分韻共哦詩

公擇失期未至再督以詩

作詩有病誰與說讀書有疑誰與決思君祇在百里間

底事相望若胡越阿連報君有來期候君未至趣以詩
想因故人意戀戀故作去魯行遲遲

醉呈亦韓

人言唯酒可忘憂我今醉廼生百感又言和氣如三春
我廼淒涼似秋慘層冰積雪春接冬安得陽鳥出幽坎
紛然桃李吾不關要與晴窻事鉛槧

呈審知并簡伯元

溪流渴雨今幾日夜月明翻我室江西回首安在哉

南北故憐無定食君居未盡喬木西舊識鄰墻解作詩
如聞過語必更僕飯寒塵禿忘其飢我思從之不可得
書疏空雲間何濶秋風吹我逐轉蓬何自翩然墮君側
君詩比昔更大好誰謂文章技非道暗中摸索未易窺
衆裏卒逢分眊瞭我昔少小嗜讀書老類賈胡空識珠
潛珍懷寶衣藍縷見之每輒驚成喏鄭君况是余所長
君得結交真邁往如我何取亦與遊聽呼殷兄喚張文
兩君抱才終有為豐年未厭甘雨遲我無良田蒔嘉穀

取譬但可同蹲鴟

比作詩從成父索不老泉并簡子進昆仲今日

成父送酒與子進子肅子儀詩俱來復次元韻

閑居顧合親杯勺醉後無人恠疎畧所嗟故舊不可同
往往茅齋成獨酌兒曹痴疾故我問問我嗜此有何樂
那知是鄉疆場寬南北東西無住著自應祇覓睡昏昏
不肯留計綬若若浮生倏忽幾許事今是何必還須昨
粗能適意效陶阮底用策勲追衛霍比年多病苦羸劣

暇日關心惟裏藥誓從歡伯重尋盟身雖欲前心迺却
今晨風日亦佳哉冬暖如春木陰薄潛魚撥刺鳥緩鳴
得處與我端相各應門走報白衣至麾去謂爾寧善謔
山陰應接已不暇安得此君仍大嚼湏臾負擔置我側
趺坐方穩為驚作問之遣向阿連家季也不爽千金諾
竟徵西園昔人例尚病無花來自洛快令汲井洗觥觴
小摘畦蔬失穿屨俱來數紙定誰氏疑枉續帖摹秘閣
抽簪擊鉢一誦之郊居賦謝東陽約蒼然暮色且欲合

檐光小占明窓拓一時頓有未足道真是曹劉暗中索
預愁取將下雷電破篋深藏更牢鑰出門仰視天雨霜
良夜初沉雲四莫

代書寄候毛伯明李叔器康叔臨張王臣

巴陵洞庭在何處我昨移官向其所士所得者毛李康
兼之舊識祁之張毛公學問本伊洛康李從之亦不惡
皆能脫去科舉累相與探求聖賢事張侯英爽固絕人
亦復降志相友親誰云巴陵洞庭側有此四士寧易得

別來書疏猶數通
辰溪隸與巴陵同
張侯再把蒸湘酒
別後不聞安與否
遙知歲晚巾屨從
當亦念我窮山中
嘗疑昔人重離別
生不相逢死何別
偶逢鄂渚行人去
嬾復作書題此句
巴陵渺渺若箇邊
何時重泛洞庭船

次韻斯遠夜歸自溪南之作

憶昔曾聞南渡初
里人最賞白社徐
君如竹林有雋子
我類犬子晞相如
君子何翅一頭出
李杜齊名真是溢
唱酬縱許並流傳
安有隋珠混燕石
我今鬢髮衰且殘

君乃春秋富未闌後人縱使加譏彈韓也固豪郊自寒
明叔用大字韻作詩見寄復用韻作七言一首

答之

人皆言君酒腸寬我亦畏君詩膽大有時長吸百川空
放意獨掃千軍敗不堪悠悠射馬耳頗願渺渺騎鯨背
問君何如差樂否願窄江湖低華泰

叔文再用韻賦詩亦復用韻答叔文兼呈伯玉

昆仲

杜陵心喜歸茅宇無復長安嘆今兩事雖聊向朱阮論
身蓋自與稷契許胡為流落不稱意長鈇貂裘遍南土
我嘗細把遺詩讀大半悲傷聞戰鼓徒空至德至大厯
田車竟絕維庚午區區清醪與肥羊何似松根茯苓煮
是翁獨破念吾廬太息明光誰避暑詩窮如是僅得名
欲作詩人寧易語要呼同志共討論客裏那知酒家媪
便從甕側覓茂世誰復尊中似文舉共將嶮韻搜崛奇
要逼蛟龍起飛舞

王伯玉兄弟皆用叔文韻作詩見示荅之

春芳凋兮瘖杜宇留得鳴鳩呼渴雨誰能使我病斯愈
矻矻深思誦詩許朝來剥啄有扣戶亟起褰裾犯塵土
三王詩就俱送與律應節疏如會鼓我家與君同鄭圃
流落殊方繇丙午豈惟交友歎雲翻亦有弟兄悲豆粢
羨君聚首共文書憐我離形屢寒暑江南豐歉未可知
安得書來相告語已過有力健如犢莫待無鬚行似嫗
我歸當事力田科君行寧後公車舉會當過我南山南

門有修篁風屢舞

寄荅晁百谷元歸

嗟我與君為近親向來未識但有聞維夏臨川省伯父
時君束書寄荒村豈知邂逅宜春郡皎如玉樹相輝映
品題舊熟大參文諸公所作皆傳信探懷贈我一紙詩
功名慷慨真男兒我衰怕作此硬語君言水漲方東之
外家自有文章種國朝名家居伯仲只今人物未厭多
屬君勉矣加研磨

贈彈琴李晞尹

臨川郡古多竒迹嚴黎已老裘父沒江山縱是詩得摹
我我洋洋亦其物謫仙幾世之雲仍平生嗜渠如嗜文
光風霽月曾次有渭北江東脚底頻忽來過我今幾日
擬欲贈行空四壁臨分謾與一篇詩箏笛紛紛敢謂知

九日病中無酒無菊寄王信州老謝丈

有身那識禁酒國何乃飄零墜其域兒曹強欲覓市酤
頗畏飲灰仍飲濕重令尋菊菊未芳飛蓬野蔓交加長

是知此物貴晚節無意與俗充杯觴生平浪說愛重九
今年無菊還無酒要攜藜杖作登臨病不如人空竚首
使君聞說同王弘半道邀公絕送迎要見一時賓與主
輿籃侍坐俱門生

二十七日既浴於乾明庵負暄久之詩示住庵
天公於人元不負書生何用深追咎無衣還可卒歲無
我有大裘聽汝覆吾家縛屋依山址晏齋之前僅盈咫
霜飈卷席不畏渠羲馭停車吾事已有時携書喚兒曹

坐來和氣生髮毛眼眇豈待金篦刮背痒不借麻姑搔
今年誰令落湖尾塞向墮戶殊未止移床也擬傍晨光
遶勃如煙紛欲昧今我懷抱不自聊歸爇生薪翻緼袍
人間萬事固絕望天賜一暖誰相要茲晨歸悶忽念浴
試覓僧廬渡喬木道人見客如昔遊為煮清泉注萬斛
湏臾一洗垢且空漸覺表裏俱冲融清虛日來滓穢去
吾貌可瘠神當豐起尋冠服風動腋却向茅簷親野日
恍然墮我晏齋前鳥語不聞山四寂道人領客殊忘倦

茗盃薰爐共閒燕為言炙背頗樂否此味可須天子獻

淳熙稿卷六

欽定四庫全書

淳熙稿卷七

宋 趙蕃 撰

五言律

壬寅元日

壯歲頻羈宦王春又履瑞東占風料峭北驗斗闌干
數堯年永條章漢詔寃殘生侶麋鹿何路接鸞鷟

人日感懷因寄玉山親舊并以示當塗溧陽諸

表弟

唐人重人日
往往見于詩
孰謂風流遠
聊須著語追
憑高縱無地
念遠得忘思
欲寄江東弟
斷腸梅滿枝

寒食日呈慶伯

浩浩風兼雨
紛紛柳與花
不知春事減
但覺旅愁加
嗜酒誰明意
耽詩老不佳
無家對寒食
相與重成嗟

又呈慶伯

下里又寒食
寒居猶去年
蕭條花不見
牢落病仍纏
強

起陪親友題詩未究宣方欣好天色雲氣復油然

詠牡丹

洛下誰移致江南種得成高株非自接徑尺信能盈恨
匪堅牢質漫令城國傾未宜貪舍有風起莫多驚

三月二日同明叔過從禮觀牡丹

新晴喚我出負郭看花來窈窕欄檻入吐嗟尊俎開媯
然同午醉老矣怕春催身羨雙飛蝶翩翩去卻回

瓶梅

驟逢初粲粲儼立更亭亭汲井洗醉盡倦譚揮塵停搜
詩未窮妙能畫孰遺形風日人間苦飛僊不假翎

再題

舊歲只五日晚梅能幾枝婆娑一尊酒陶冶數篇詩
靜游蜂寂簷深立雀窺書齋寂寞裏藉爾對支頤

題堂前梅花

廢宅委塵埃梅花亦自開九泉無起日雙鬢有新摧
索莫生何理飄零句易哀若為歸去晚茅屋老蒼苔

客長沙邢園堂下梅花一萼先開有懷成父斯
遠二首時聞朱先生辭江西憲節歸舊隱恨不
與斯遠同上謁也

老樹發青枝晴多雨亦奇一花成獨破病眼得先窺又
作殊方見還成寄遠詩不知閩與浙何處念乖離
亦到溪南否還能念我不梅花今次第客子政飄浮師
法真難得微官盡罷休饑寒還累我寤寐只闕憂

咏梅六首

十月江南路梅花次第開殊方孤病眼高興闕詩材幾
日風鳴屋連宵雨浥埃曾令四郊覓未見一枝來

臘前能幾日年後不多時五嶺無千里東亭共一陞胡
為欺北客未即見南枝或謂冰霜候還憂衣褐為

老眼從昏翳高情未脫遺雖云謝能賦政爾動相思彼
自無妍鄙渠寧可磷緇猶須藉名勝相與厚襟期

縱乏幽人宅猶餘大樹祠帶山仍帶水宜飲亦宜詩勿
待全開後當乘半放時昏昏廓陰霧皎皎上朝曦

謂伏
波祠

前老
梅

溪北溪南路山前山後居興來隨杖屨意到總林廬觸
目常懷爾關心相憶余雖然風月趣千里故非疎
幾日寒如許梅花好在不汝雖甘寂寞吾自念深幽靜
塢無車馬清溪足鷺鷥何當細扶杖隨處小遲留

謂折
遠

十六日雨中憶梅花

莫問帆遲速且看山晦明賦詩忘意索圖畫得天成白
髮應無種流行詎有程清霜可期至郢樹合爭榮

次韻何叔信書齋梅花

坐對牕中帙起尋簷外花因之觀物化藉以發天葩一
笑故無恙百年終匪他端殊苦心士志失鬢先華

嚴先輩詩送紅梅次韻

畫道梅花白能紅又一奇
渾疑丹換骨不是酒侵肌
看此敷腴色思儂少壯詩
盛年雖不再猶擬歲寒知

植梅一株于廳事之後
招丞及明叔同觀
倪嚴
二先輩送酒陳簿送茶因以成集

有竹似吾家無梅覺欠花移將香索莫來伴綠交加好事適醜酒詩情仍得茶相過况非遠勝處莫令賒

和何叔信別種蠟梅韻

不識梅當牖唯知竹映牆脫成元似蠟染就卻殊黃自是風神秀寧由肌骨香木犀雖瑣碎品色庶同芳

師契約看白蓮

勿陋盆為沼能生徑尺蓮乍開冰刻鏤欲謝羽蹁躑得意疑來鷺凌波欲問仙平生茗雪興擬借葉為船

叢桂

漫道希為貴那知夥不奢江南故多桂秋仲舉敷花往
往因人好蕭蕭得句佳人誰不種菊千載但陶家

元之去非來邢園折牡丹醑釀碧桃以去

花取三英粲時高兩玉人毋嫌應接費要悟色香真詩
定一題紙酒應多入脣病夫方坐穩幽獨恐傷神

理菊

攜鉏乘夏雨分菊待秋風幽事常闕我閑居不負公苔

深連竹地籬破接蘭叢更約兒童輩須勤灌溉功

暇日過在伯辱對菊置酒已焉甚醉得四十字
雨後江猶漲霜前菊正繁波光搖檻楫花氣入楹軒病
不勝杯勺情欣接話言兀然成徑醉涕唾老仍煩

牕前葵萱皆吐花成詩二首

僮能去蓬藿手自植葵萱疊石就為砌啓牕因當軒後
先殊早晚開歛共朝昏長夏曷以度幽花相與言

落去梅堪裊乍開臺更重老懷非我獨幽質為誰容短

髮簪猶惜高軒詠可供還愁早衰歇無以慰疎慵

詠智門佛殿前凌霄花與斯遠同作

桂栽初得地藤附亦凌霄層葉圓如葆高花豔若燒故
能開續續殊愈落飄飄有木方思種從僧會乞苗

咏蕙

莫與蘭爭長風期本自同俱高漢賦上並錄楚詞中斛
種當書屋簾移自佛宮更餘千箇竹相與慰詩窮

護草

伯兮當日意護也直云忘豈是名茲草真將種北堂能
叢又能幹非絳復非黃開處陰當合看時晝閱長

楊花

雨樹蒙茸集晴空散亂飛若為能撲撲何只詠依依花
裏渾迷蝶風前屢點衣未妨吹盡得病起帶寬圍

蛺蝶

不逐春風去仍當夏日長一雙還一隻能白或能黃戀
戀不自已翩翩空復狂計功歸實用終日媿蜂房

偶得掃竹因培竹五字會仲威見過留與明叔
同飯用此語成詩

掃竹因培竹畏人非避人
竟然聞響屐莞爾正歌巾坐
子竟日久飯吾三韭貧能來不嫌
屢梅底要深巡

斫病竹

採掘寧慳供護持期有成時
今閱春夏爾獨意枯榮瑣
碎日無影蕭騷風罷聲
樵蘓勿懷辱而我豈無情

新竹

新竹不數輩歲慳非地貧破苔方挺出突屋已長身未
害少為貴居同德有鄰山中乏朋友舍爾復誰親

題新竹示韋德卿

戢戢初成茁駸駸漸可竿朝幽粉淚漬午靜籜聲乾枝
且勝棲羽陰仍合翠寒書齋有餘暇可以過予看

竹迳

一日猶思種長年可不栽初時叢足玩歲久徑成開明
月雖妨約清風得叙懷未須緣客掃頻肯為詩來

種栢

挿柳終慙挂殷勤買栢栽予如樗櫟者汝自棟梁才今
日藩籬護他年風雨哀人生朝暮爾此物到雲來

堂下梅一枝開遲而花極小疑地勢使然感歎
而作

梅發無衰盛根生有瘠腴都緣托地薄故使著花癯
小吾憐爾伶仃爾念吾詎須詩欠興何用竹相娛

梅未開書四十字

地與南荒接梅花合早開如何長至後不見一枝來政
爾緣霜早多應待雨催簷邊有獨樹日遠故千回

約老謝丈及諸友尋梅

聞道梅花發山邊復水邊要穿居士屨還傍野人船盤
礴須窮日飄零憶去年攜壺雖我約能賦屬公先

梅傲開復題

晨起渾無事巡簷立久時不驚新苦瘦頻憶舊題詩次
第開全樹挽先見一枝故園春尚晚折寄欲因誰

陳巖二先生和前詩見示次韻報之

梅藥何曾見詩筒已再開如憐今歲盡喚起好春來咫尺花當動侵尋老故催不知榮悴閱更得幾何回

和荅曹季永縣尉用前韻見貽

早久疑成癘梅枯未得開悵然因有句作者曠能來風日寧渠貨光陰覺我催卻愁看欲盡憶著首頻回

梅驟開旋有落者

強說歲寒姿曾無旬浹期多緣風日苦休道雪霜欺烟

烟方懷壁依依遽泣岐飄零陌上土收拾卷中詩

梅且盡作四十字

江梅自癯瘠挫抑豈多禁未臘憂風雪先春病雨陰開
時能慰眼落去更關心何以寬愁寂村醪得屢斟

至節後猶未見梅疑旱使然

敗砌初無菊空林合有梅如何長至後不見一枝開豈
是春渝信端緣旱作災蔬畦與麥壠滿目但黃埃

和斯遠西軒竹二首

軒闢因松倒，軒深為竹成。
山靈回俗駕，鳥語助詩鳴。
客子息肩地，諸公攜酒行。
白頭哀我獨，青眼為渠橫。

道上行人暘林間，釋子幽去無相趣。
迫聊得小夷猶，竹樹擁簷立溪山。
隨檻流自非能賦者，常是欲眠休。

同成父弟訪王亢宗過周欽止同過圓通看竹

二首

訪客因逢客相攜，看竹來徑從林下轉。
門向水邊開高，顧防驚鳥徐行恐。
破苔故嫌溪淺落，妨我泛舟回。

鄰園伐曾經，園種得成不闕。新雨過，自是絕塵生跡。
直能明眼幽深，足叙情何當共攜。被重此聽秋聲。

飲袁州惠仰山茶

黃溪方輟供，頓有仰山來。久怕羊腸險，小聽松吹回。喜
能澆渴肺，愁柰走饑雷。何日俱君謁，香凝燕寢開。

大琛沽酒

吾州大琛酒，名不謝孤洲。女子亦知價，酒家多
韓姓行人皆

繫舟西來灘，過險東上寺。逢幽未說千憂，散姑為一醉。

謀

鄰居送梅子朱櫻

山居蔬果少口腹每勞人梅子欣初食櫻桃併及新供
鹽貧亦辦薦酪遠無因便可呼杯勺數朝陰雨頻

螢火

渾忘生朽腐直擬暮光輝解燭書帷靜能添列宿稀當
風方自表帶雨忽成微變滅無多理榮枯會一歸

贈墨二首

奚李風流遠名家得自賢
粗能明款識不暇別中邊
歲計一丸足癡人連屋懸
此生能幾屐茲士信超然

斲我千年質成茲數寸瑩
當從黑白辨豈問姓名題
願效文章用寧辭肌骨封
先生無浪語略為究端倪

贈硯

一種端溪石下巖滋別源
千金騰有翼尺璧走非跟
自顧婆婆質適堪椎鈍根
終焉老茅屋已矣獻金門

硯答

食硯固可笑硯枯還有云先生信難說吾事亦徒勤歲久當消髀研窮且斷筋不如因墜地瘞得退之文

讀子進浙行詩軸中有二詩見寄次韻報之

近有平安使新詩得盡傳深懷行役苦更憶弟昆賢笠水鷓夷子荆溪玉局僊經行如有訪小為繫歸船

何夕佳風月仍陪笑語清依依數行李了了盡平生要使交游態渾如手足情居閒有此樂那用占時名

秀奕以文編垂示簡之

每念新疎闊還思舊倡酬年齡故相並文事孰能優媿
乏聞多益難支問不休黃陳有正派舍是復何求

以近詩寄丘運使

古債自難買良工徒苦心誰能明致力于此是知音門
第成爭隔江湖阻滯淫寄書因有使還得附微吟

呈林子方運使四首

去歲都城容傳聞召節馳深期遂披覩得以叙乖離竟
復參差是空成悵望茲外臺知不遠匹馬敢言疲

憶自梧州別懷茲下榻勤寸心長炯炯尺素每云云遠地必迂報高情真薄雲百年公幾見五十我無聞

一代推人物諸生賴楷模高風雖莫並盛德本非孤物望歸臺閣官稱復轉輸澄清雖雅志獻納政時須

白髮絲難理青衫葉半枯自憐謀斗食敢作慟窮途試問遙書札何如邇坐隅合江趨浩渺分水忘崎嶇

投曾原伯運使二首

一自嘉禾見于今歲幾多飛騰公可那流落我如何舊

說金能點今成鏡失磨未甘終痼疾還復向醫和
遠地書郵絕長年屬望勞要期親帚柄寧憚學舟操媿
守藩籬小難窺牆仞高秋風滿天地不廢候蟲號

以近詩寄尤運使

求識尤太史泛舟維豫章秋天值搖落行色况蒼茫竟
乏驚人句莫升君子堂學詩雖老矣猶擬遍諸方

呈丘運使三首

海內求名輩如公得未多風流正始士藝達孔門科願

識亦已久陳詩無見訶蒿蓬雖培塿松栢自嵯峨
奔逸聞千里飛騰見九遷禁途才咫尺玉節屢回旋
看即自天下催歸夜席前如憐落鵝外為遣反驅邊

從士二千里學詩三十年坐窮寧為此將老豈其然
恥食陶奴米羞言夷甫錢相逢何用早契合有志年

呈黃永新希二首

江夏無雙士嘉禾百里君信非今日吏要與古人羣
閱世臥松栢過前紛蚋蚊薰蕕自我別青白在渠分

偶作空房寓頻成假日從平生壯詩膽一見怯譚鋒天
地雖云礪江湖詎不容終南捷徑絕衡嶽臥圖逢

君有病

又性
嗜畫

呈張太平三首

游日甘泉舊如公孰與先內雖資獻納外乃藉蕃宣今
日江淮地寧惟牧守權功名端未晚勉力繼青氈

貴者多驕士古然寧邇來惟公獨超俗片善靡遺才舉
已滿臺閣勤方散草萊深知桃李徑不為看花栽

門牆十五載每見辱加親老至名不立道乖家轉貧世
誰能我及志欲向公申賸欲搜詩獻青山恐笑人

送劉通判二首

射策今晁董摘詞昔左班題輿已最課召節待遙頌鵬
背九萬里龍媒十二閑除書看臺閣盛事聳荆蠻

國祚重興後人才應運生端殊飛紫鷲亦異夢長庚大
半廟堂用若為州縣更垂弧賀今日連茹徯茲行

寄趙信州一叔二首

蓬山辭上直番國喚回舟舊事起千佛茲行奪萬牛未
除真學士且列古諸侯詔旨防敦迫民言願借留

官梅親手種山閣聽僧修

公直梅後園及
屬僧修靈山閣

授簡慙吾事

登高企勝流葭莩元有託桑梓近臨州媿我資身拙從
公但食謀

呈葛撫州二首

人物與江山風流適此肩家聲自勾漏出守更臨川美
政人人說新詩句句傳五言成漫興一見豈無緣

試說臨川郡江西第一州晏王今邑子顏謝古諸侯未
覺流風遠端知物望優峴山猶得擬湛輩肯容不

與李潭州椿壽翁五首

荷橐上甘泉居多政府遷胡為抗章謝而必退身全自
計雖良己人賢詎舍旃吾心故公爾斯道合幡然

疏去良臣散文興大老歸能忘繆公側何有步兵幾暴
虎無苛政鳴岡覽德輝輩雖參落落業且相巍巍

今代長沙帥當年漢李膺登門故未易為御亦堪矜嗜

好雖章句經營在斗升青衫舊藍縷白髮近鬢髻

萬里沅湘路千年賈屈文迹同探禹穴心每望堯雲未
說渺茫隱長思矍鑠勲不應迷出處四十畏無聞

日夜霜風急東西客路昏詩方學蠻語病昔似文園俯
上轅門謁愁干節制尊頑踈寧自昧剪拂望深恩

呈李贛州四首

憶昔重湖北逢人問處州寄書寧盡達覓使苦無由風
月無離闊山川自阻修那知遠遊擢又傍昔年洲

見自長臺數于今十五年雖云公偃薄政坐我迤邐苦
志思重寫愁腸不易煎却憐難掩處霜髮半蕭然

安否每難問姓名今得通久憂埋積雪大喜得春風與
世故多識如公能幾同既欣還有感愁對海棠叢

學時元草草賦就每怱怱竟復無真好空令坐枉窮春
風纔亂鳥秋雨又鳴蛩笑我胡為者真成浪自攻

贈劉進父監廟四首

退士今安有微官詎足旌如蔬知味薄不飲見神清要

是高其事况堪詩有聲淮南人物論是亦一權衡

北客自無幾老親寧重論客居誰肯記郊寺辱深存厚
義真難得高情獨見敦寒燈仍薄粥相與話黃昏

彼美南山石槎牙更貫之道雖橫至寶誰復賞竒姿歎
息已云屢寫摹嘗有詩吾曹從行者名字亦俱垂

歲晚戒行路問君何遠征風霜雖自苦墳墓不勝情南
徙計豈得北歸邊未平非惟慕嚴父抑亦念難兄

呈楊謹仲監廟三首

抵道無前輩于今識後凋形容猶矍鑠鬢髮自飄蕭
日破萬卷暮齡甘一瓢紛紛盈鄭衛洗耳驟聞韶

劉孔何如士歐蘇敢並行江山故好在人士熟知名道

遇澄清使為言月旦評經過纔一見已似慰平生

趙子直為

余道其人

地占清江勝居兼水竹幽衙門阻靜僻高臥樂優游
深霧隱玄豹滄波翻白鷗弓旌不可挽芻牧政旁搜

十八日分謁升德廟過江作

命有叢祠事晨興敢憚勤渚沙微隱艇山木總藏雲雨
勢紛未已詩材恍見分中流更回首片片媿鷗羣

寄峽州使君郭郎中三首

漢代郭林宗詞場繼國風郎官曾賜被刺史暫憑熊為
容留工部移官滯酒翁淮陽豈為薄無恨不居中

何處觀文獻如公尚典刑詩先獲麟作字本換鵝經牛
斗漫寶氣虛危須德星無為偃薄計不晚詔除聽

契自西臺叙親從昭德論名聲葢前輩牢落媿清門既

見未知日因風聊自存
抵愁千里面識我故塵昏

馮守生日

西漢馮君裔康時萬石家
治邊清歛角勸課足桑麻
誕日今年再歡聲闔境
譁無言政長夏亦可醉流霞
報政期年外裏言朝夕
間省郎何太晚召節看
遄頒屢上薰風殿行參玉
筍班故應憐末掾卑落尚羣蠻

移官巴陵行有日矣書呈唐德輿程士和梁和仲于去非段元衡邢大聲七首

驟雨落還收餘寒去却留飄零梅樹底髣髴杏梢頭酒
有連朝病詩從一笑求平生湖海興又復具扁舟

門戶憐非寄聲名歎不羣倦遊俱楚子舊識記番君去
覓江山助行思風月分詩成如枉寄亦足張吾軍

問訊書能數飄流見愈親通家如弟數受賜亦州民
莽重湖路羈棲一病身欲行行未得風雨况頻頻

太史羲皇上嵩山季孟間諸孫均內外文采被爛斑
顧我何足數遺風莫可攀知音愧流水仰止在高山

有集能行世初疑是古人大波皆洶湧小石亦嶙峋時
譽歸離校微官尚徼巡竹塘春水滿雙鴻會飛馴

客裏仍為客天邊嬾問天春風幾經歷老病一踟躕君
句真嚴律儂詩但散禪錦囊如許借不憚手親傳

只道花爭發那知雨較遲病軀猶故絮霜鬢益新絲鄙
性豈耽酒寫懷聊賦詩經過頓能爾無久溷公為

諸公皆和詩再用韻併屬湛挺之七首

誼也期淹速淵乎任去留服來占夏首歸去及春頭豈

必憂懷累當從樂處求控揣終異物窈窕一孤舟

戰戰一天翻紛紛九馬羣回頭異生死對面或公君漸

欲薰猶等反嫌黑白分居然櫻衆怒政爾怯孤軍

翰墨平生友江山數面親誦騷悲楚國訪古夫秦民丘

壑宜無趣塵埃空此身風行思數數糧食厭頻頻

吳楚他鄉外沅湘久客間已知身若贅詎惜鬢成斑酒

債負常有詩壇老倦攀窮猿難擇木怨鶴望還山

和我閒中句俱來作者人步吟才勃窣聳詠忽嶙峋浪

說能聲喜端虞試問巡天資固有分野性雜難馴

投老知何地此生休問天未須悲坎軻聊復寄蹢躅但
覺官如縛渾忘詩似禪不堪兒子誦敢望故人傳

舊作游梁倦今成去魯遲跳珠先集霰凍雨亂琴絲蕭
瑟夜來酒悲涼別後詩洞庭歸雁蚤枉寄莫遲為

既別晦庵復成二詩呈之近欲同游善權不果
臨行錄其湖北道中詩一軸

既返山前棹還斟枕上杯雪飛如喚住鴈叫苦催回金

瀨半篙綠石亭千樹梅竟孤陪李郭亦愧匪鄒枚

去始豐城劍還終大仰禪

記所抄詩
卷起止

縱橫幾詩句摹寫

百山川竹使承流日蓬山促召年儂行亦何為白首使
如遷

玉汝置酒招二十一丈同之鄙句奉呈

薄宦一鷄肋飽霜雙螿螯祇言成爾負那卜會吾曹我
已媿蓬鬢君俱追錦袍團團石頭月其下走江濤

頃官
江右

嘗得句云可憐薄宦一鷄肋負
兩飽霜雙螿螯久未能用云

賈文用昂字韻作詩中有見及復用韻奉呈併

簡徐謝二丈

人謂先生老詩壇近一昂共知文力健何有鬢毛霜自

料才非敵從今氣減狂同宗有徐謝我亦漫窺牆

徐東湖謝

洪堂皆八

宗派者

呈叔驥和叔

吳楚山川隔壩荒笑語歡柳遲因積雪梅悴坐餘寒痛

飲還憂病離愁孰可寬故非元與白壓倒又何難

叔驥曾示

以所賦喻工部
困池詩甚佳

二十一日晚呈全真沅陵師契

酒味雖云薄談端卻甚長
過從未能數咫尺每相望
幾念乘羸出還嫌觸熱妨
簷昏書掩卷月晚坐移床

呈毛伯明李叔器

陰雨春三月倦遊天一隅
故難同類我還復歎猶吾不
感防終蔽無聞恐遂愚
猶欣得師友可以慰羈孤

寄湯司諫

自發袁州使侵尋復暮春何人話安否官路政艱辛章

貢未歸客湘沅薄宦人何當一傾蓋肯作白頭新

何人謂葉

永伯

寄謝湯司諫二首

十往九不報好辭開幾番
誇張示朋友問訊異寒溫
豈必待傾蓋何時真掃門
絕勝東閣下布粟對公孫
章水清初漲梅花雪正飛
不惟催我去似亦待公歸
有弟能頻說高情真見幾
男兒出處耳麟閣與漁磯

送湛挺之提幹自武陵迎侍於侯官兼寄鈇山

尉曹馬莊父二首

太學聲名舊丈昌
薦墨珍銓曹略常
調幕府得嘉賓使
檄辭南楚安輿發
故閩春風滿行色
有賦不妨新

未歷番君國先乘
汭口船春波元甚
駛順水豈勞牽我
去殆同適公行真
若仙壺頭雖不遠
不見馬文淵

寄吳吏部三首

振眼看翱翔經年
尚省郎詔除應邇
日傳播未遐方渺

澗山連蜀滔滔水接湘有懷雖晝夜其奈道塗長

元日送朝天侵尋又一年無詩供猥誦有志辱哀憐茅
屋蒼苔合芳洲杜若搴去留俱未遂兩鬢已蒼然

梅逐輕冰泮春從細草生孤山應最早假日想頻行竹
閣思賢意菊泉招隱情柰渠歌鼓競使我驚鷗驚

呈王平江二首

倦著尚書履閑凝燕寢香聲猶傳漢殿句豈羨韋郎僊
泊姑鈴閣遙歸定玉堂不惟資獻納政復用文章

先生自詞伯舉世孰詩人縱不藏人善慚無佳句新每
懷青眼舊應念白頭貧未弭沅湘楫蒸湘復問津

蕃初見公

于蘆州蒙賜帖
有詩人之目

贈張次律司理三首

長沙有賢掾京兆出名門筆力追前輩陰功及後昆龍
門首加薦樞府舊彌敦看即飛騰去寧當尋尺論

及是凡幾見於今乃白頭殷勤蒙飯設緩急與醫謀夫
子自為德畸人何足憂諸家何所厯更有若人不

長沙今十日曾未及湘山舊疾疴頻作方爐火自跼風
高知木脫雨細念梅斑飄泊方茲始林園未遽還

次韻師契詩中及賑貸事

督賦停勾赤開倉體詔黃舊唯優附郭近乃略諸鄉天
意終深卹人謀豈盡長要須梅雨歇快放麥風涼

早出小北門

聞道瀉皖下雜然仙佛居心期窮杖屨宿昔戒車輿晨
起先僧磬逢人盡趣虛烟霏欣在望風露儘侵裾

夜賦二首

欲寐已成寤暫欣還作悲三更風雨聽四海友朋思拊榻蟲頻息挑燈鼠屢窺莫呼僮僕覺翻到自題詩

下上巖嵒路往來苕霅舟何勝百篇詠不啻十年遊志

願終漁釣經蹊熟鷺鷥清風慕唐漢高友得孫劉

謂子陵玄

英从遠齋子
進父子兄弟

二十日同官相約過水鄉菴雨中先至偶成二

詩

約客客來至尋詩詩偶生秋如驚柳色雨未改荷聲
湫湫江湖趣悠悠鷗鷺盟意雖能浩蕩筆迺欠縱橫

此雨不易得有秋端可期微官如飽飯餘事亦窮詩
鷄遠村場聽鳩深客路疑是身真已老何事此長羈

秉文以田事入村歸而寄之二首

村村獲稻急得得跨驢行別野片時役好詩無數成羸
軀難並出病眼待渠明落日斜猶掛涼風晚更生

屢雨不濡土涼風茲已秋不知今歲事定獲幾分收日

糴每懷慮歲餘當遣憂題詩纔紙尾又取望雲頭

伯威和章記祥符定交云爾蕃之次韻曾未及
此再用韻作二首後一首重寄伯山尚留太和
伯威詩乃去臘既望寫四月晦蕃始得之

前賢嗟不及夫子益其流海內聞詩熟言間愜意投午
暄同靜廡暮雪阻高樓別似崇晨耳一年今半休
不作山王詠故聞嵇阮流龍淵失珍襲猿木悔窮投子
句成江閣余懷限戍樓碧雲嗟暮合黃髮誦歸休

別沈二弟

一別動五載此生能幾回其間何不有祇是恐生哀我
病真衰矣君才盍勉哉要留還索去風雨更漉漉

呈逢宣子

歎息逢宣子頻為郡國賓人皆說才具我獨愛詞人避
逅殊方見淒涼半月春但能詩似鏡從使鬢如銀

昭禮書來告其行日再寄以詩

已執臨岐手仍通敘別書絕知於我厚何敢向君疎江

上留殘歲吳中擬定居莫為南北恨天地一蘆盧

自作

素仰儒先德兼聞內助人齊家真有道相敬儼如賓女
已節義著兒仍經行醇他年書附傳落落衆星陳

聞劉凝遠文病已欣然成詩并懷伯瑞仲文叔
驥二首

我行過苕水公疾卧漳濱底處書傳鴈如聞藥有神作
詩應更老比舊想增貧坐與江山隔何緣杖履頻

諸子皆文士仍傳驥絕羣連牀思聽雨拄笏漫看雲病
有交遊念書無歲月勤扁舟問歸路應見老參軍

伯瑞
為衛

州法曹
參軍

呈楊溥子

曉過子雲居霜風柳未疎飄零五年別斷絕一行書安
否勞苦外詩編吟誦餘君寧老騏驥我已媿春鉏

呈公擇二首

背郭纔數里深林溪四環精廬于此建寓舍即其間我

已成棲遁君能數往還故知交義厚不與世情關
此地無此客若人吾故人論文皆意到出語見情真未
議作輕別且當留浹旬畦蔬飽春雨小摘未妨頻

呈邢叔三首

前輩已云遠公身親見之老成疑故在風俗未憂衰問
學本日用文章先達辭從茲得夷步不復困多岐

瀏瀏晴簷響惜惜蘭斛香時于簿書暇樂是話言長政
可畫連夕興懷參與商平生事賢志炯炯未嘗忘

聽說挑川事憑虛意欲仙真成在人境無用覓漁船卜
宅自何載賦詩凡幾篇揮毫儻毋靳圖貌並流傳

呈亦韓

寒食寒未歸清明清曉時花殘湫無迹柳細不勝垂即
事須詩寫多憂賴酒支雖親友朋益更苦弟兄思

呈審知

晨出及未熟飯餘因就談結交真有道致此亦何堪靜
聽多聞益微吟佳句耽疎簷有新月當共影成三

次韻和叔并呈叔魚

魚名
筌

望望吳楚隔悠悠兄弟思經行偶來過喜極為成詩二
父已名世諸郎皆好辭誰云前輩遠未覺此風衰

呈全真魯山

有懷思放曠茲地窘幽潛屋脊山微見庭前樹莫添把
書唯立壁扶杖抵巡簷深羨憑江宅登臨萬象兼

呈唐德輿兼寄呈可久三首

白頭四海容青眼幾何人况復平生舊端殊數面親丈

聲雖益振仕薄亦何屯好在章江水聊堪濯世塵
前歲長安雪從公飲屢過放談成絕歎狂態亦悲歌我
仕魚緣竹公行漩繞渦相逢雖足慰相別奈愁何

敬作沙隨問歸來安穩不一官成棄却微恙想今瘳詩
篋猶堪倒錢囊不用謀更思從二老何日具扁舟

呈陳深父二首

相望僅一水相賒逾十年尋君向蕭寺歎我已華顛老
至是其理窮來當益堅雲深雪溪樹塵暗曲肱弦

役後到番國悠悠誰故人僧房半牢落湖水失清淪我
豈倚樓趙君真驚座陳何為辱傾倒相與盡情親

呈晁舅祖叔蘊

輩行雖如祖年齡僅可兄經過得屢見文字有同盟門
戶當深責饑寒馱此生良農務穠蕞初不計秋成

呈許深父及之

路入分宜縣心馳月旦評參差萬木合曲折亂灘行江
右孰茂宰斯人垂大名鳧飛看公入鳶墮黯余情

俗有雪上加霜之諺今日之謂也二詩呈知縣

契大教授尊兄

歎我貧兼病當渠雪上霜忍饑無異術炙背有奇方
憶茅簷下還嗟楚水傍官曹竟疎闊詩病得商量

雨雪欣能霽冰霜苦未知體孱寒有相絮敗暖無多
二妙今誰敵有詩皆可歌暗中知沈謝灰裏撥陰何

呈李思永

往見劉夫子得聞君姓名飄零方客路邂逅若平生
學

要精微講文須仔細評道林并嶽麓他日得經行

呈宋伯潛

學有南軒派文仍二宋家泉源端有本玉立更無瑕儻

遂成三徑當從讀五車朋游有如此未恨落長沙

伯潛方陞

京秩而云不欲
注見次故云

再呈伯潛

政爾羞餘子胡然說故家人方笑藍縷君乃不疵瑕厚

義重縞紵空言非笠車委思精絕處百鍊出披沙

再呈思永

賢氣疑猶在諸公盛得名新知雖可樂舊恨卒難平我
句野無格君詩工莫評青錢宜妙選墨綬盡遲行

呈劉子卿四首

南渡六十載况談元祐時故家垂欲盡遺事莽難知文
字既多舛傳聞寧破疑唯公有源委萬折必東之

近喜周公相初傳薦士章非才孰為治與國倍生光故
國異喬木白駒空食場彈冠與結綬吾道不其昌

王氣東南盛流風西北疎
往猶稱旅寓今迺逐鄉閭
要熟兒童聽惟傳父祖書
如公不一二安得亦相於
往自清江別于今近十年
依僧聊避暑擁節會朝天
我愧不如昔公乎真過前
政規期斷手明本已終篇

別邢公昭文

適遠能忘別衝行敢憚泥
野航初喚渡茅屋正啼鷄
雨後妨梅步風前對竹題
因公動高興憶我舊幽棲

次韻周欽止送別

不見送將歸惟聞遠別離身今成老大官豈計高卑蕭
寺已移酒使人還枉詩臨風三復罷有恨落無涯

留別子蕭子儀三首

度橋遵野徑夾樹啓籬門剝啄傳呼疾周旋色笑溫萬
金纔到幾一棹復過村卻恨儂來獨飄零說在原

長年夢黃堰今日飲紅灰徑綠無多草庭陰半是梅海
棠留雨醉楊柳傲風媒對此渾無事一杯重一杯

一別動五載人生都幾何談端方間起行色又弄波曠

欲據離語不成翻醉歌飛騰與流浪已矣兩無那

留別陳明叔兼屬胡仲威五首

我去孰君友君留誰我遊定應緣宿契不待分今投年
事鬢俱白時名詩獨優未知茲日別重見又何由

論事從違數題詩竄定頻客君徒得重愛我不言貧薄
俗無兄弟我曹相主賓別觴終作惡別語要須真

簿領三年吏江天百里居我非拘鴈驚君乃傲樵漁得
譽且得謗似高仍似疎襄陽耆舊傳書子定聯予

我覓祠官俸君攜異縣書一窮直若此五字果何如底
用頻看鏡終當老荷鉏未知渠作計頗亦似儂無

汲汲求交友良由不敏姿風流伯始後文獻澹菴師此
士世亦寡因君交不疑倡酬凡幾紙別後慰相思

留別折子明丈二首

久作湘中客數從林下游契繇先世叙人向古人求我
敢逃黃綬公寧臥白頭廟堂有北客人物想中州

行橐何輕重新詩得卷藏猶須與先集併為補山房更

欲詢言行持將益廢忘匆匆語難盡莽莽恨空長

留別徐季純

隱墅夙未到扁舟空屢經灘長石壁寺洲遠穀波亭厚
祿頭空白新知眼倍青雖云遽離閩也足慰飄零

重別成父二首

盡室蘄偕隱持家又即浮可憐居不易還是食為謀風
雨連朝暗江山千里遊不能攜汝去翻覺重吾憂

中原歸尚棘三墓久成蕪未議增封樹先宜禁牧芻使

須營虎落將以護龍雛不用平安報惟期剪伐無

送恭叔赴海門尉瑞叔約同過湘西酌別四首

寓舍我至晚官期君已催猶當載酒別共作訪山來雪
谷看題字風雩話昔開樂山并樂水隨處一裴回

君歎父兄別我嗟朋友疎窮冬仍遠道異縣復離居僅
得追隨再何由懷抱攄因來湖外使為寄海邊書

楚岫新經雪湘江半露沙蕭蕭斷行鴈渺渺後棲鴉別
意渾相似詩成祗重嗟未嫌杯酒滿直恐鬢霜加

入自芝蘭室重之珠玉淵一官從草草萬卷本便便對
鏡平多壘閒郊闢廢田尉曹應事少賓友定誰延

留別徐斯遠時斯遠將赴朱晦菴之約三首

共有山林趣相期問學功一官重此去三迳幾時同我
鬢因詩白君顏非酒紅從遊縱有日羸疾柰相攻

君質故甚美加之仍得師今為李君御何後老人期念
欲通名姓還憂辱棄遺何當武夷下與子共追隨

事變將酬萬身分若化千淒涼辭古寺辛苦問江船秋

得村村雨涼生樹樹蟬重哦五七字還約四三年

坐中留別正之

已別還成住多君意甚真自非敦友好寧復見情親
月已秋中過雨如春暮頻臨分匪杯酒幽獨恐傷神

別趙信州

拍拍桃花水輕輕蓮葉舟生憎衝野馬失喜見沙鷗
漫浪端如此饑寒信有不未探懷玉蘊且訪九華幽

別趙叔

漢廷無出右天下舉歸心歲晚雪霜韜春餘桃李陰班
崇貳卿貴掾落五溪深勿謂無回鴈郵傳可嗣音

別宗父


許日問何滯今晨真遂行人生苦飄泊歲事復崢嶸鶴
髮欠亡恙燕雛憐未成臨分再三語不為別離情

別馬莊甫

邂逅成深識慙慙不作遙鵝湖書後約汭口騎能招奔
逸君誠俊衰摧我不聊嗜書甘寂寞破敵看嫖姚

別楊謹仲

籬竹又離籜
沿荷還疊錢
我來成佇立
公為起高眠
清靜子雲宅
扶疎陶令篇
三年渾易爾
此別各蒼然



淳熙稿卷七